



Službeni glasnik OPĆINE OLOVO

Godina XVII

Broj: 6

Olovo, 13.06.2013.g.

Na osnovu člana 2. Zakona o osnovama sigurnosti saobraćaja na putevima u BiH („Sl.glasnik BiH“, broj: 6/06, 75/06, 44/07, 84/09, 48/10 i 20/13), člana 3. stav 2., člana 4., člana 9. stav 2., člana 10., člana 13. stav 4., člana 19., člana 22., člana 24. i člana 25. Zakona o cestama („Službene novine FBiH“, broj:12/10 i 16/10), člana 54. Pravilnika o osposobljavanju za vozača motornih vozila („Službeni glasnik BiH“, broj:15/07) i člana 18. Statuta Općine Olovo („Službeni glasnik Općine Olovo“, broj: 2/07) Općinsko vijeće općine Olovo na sjednici održanoj 04.06.2013.godine, **d o n i j e l o j e**:

ODLUKU O SAOBRAĆAJU

I UVODNE NAPOMENE

Član 1.

Ovom Odlukom utvrđuju se osnovni principi ponašanja učesnika u saobraćaju i drugih subjekata u saobraćaju, osnovni uvjeti koje moraju da zadovolje javne ceste i nekategorisani putevi u pogledu bezbjednosti saobraćaja, uređuju uslovi i organizacija saobraćaja na javnim saobraćajnim površinama na području općine Olovo te mjere za njihovo provođenje.

Član 2.

Javnim saobraćajnim površinama u smislu ove Odluke smatraju se javne i nekategorisane ceste, ulice, trgovi, trotoari, javni prolazi, pječaške i druge staze, parkirališta, stajališta javnog gradskog saobraćaja i taxi prijevoza.

Član 3.

Saobraćaj na javnim saobraćajnim površinama dozvoljen je svakome pod jednakim uslovima. Učesnici u saobraćaju dužni su da poštuju odredbe ove Odluke i druge propise iz oblasti bezbjednosti saobraćaja na putevima.

Učesnici u saobraćaju ne smiju da ometaju saobraćaj, oštećuju put, objekte i opremu na putu.

Član 4.

Javne ceste (lokalne ceste i ulice u naseljima i gradu Olovu) kao i nekategorisane ceste na kojima se odvija saobraćaj na području općine Olovo, moraju se održavati u takvom stanju da se na njima u svim uslovima vrši nesmetan i bezbjedan saobraćaj.

Preduzeća kojima je povjereno održavanje javnih puteva i nekategorisanih puteva dužna su da blagovremeno otklanjaju sve nedostatke koji utiču na bezbjednost i sigurnost učesnika u saobraćaju.

Član 5.

Javne ceste (lokalne ceste i ulice u naseljima i gradu Olovu) kao i nekategorisane ceste na području općine Olovo moraju se opremiti saobraćajnom signalizacijom u skladu sa odredbama Pravilnika o saobraćajnim znakovima i signalizaciji.

Član 6.

Korištenje, zaštita, rekonstrukcija, održavanje i izgradnja nekategorisanih cesta, kao i poslovi nadzora nad tim cestama vrše se u skladu sa važećim zakonskim propisima.

Član 7.

Korisnik ceste i PU Olovo dužnisu obavijestiti nadležne organe o pojavama oštećenja puta, saobraćajnih znakova i objekata te drugim nepravilnostima na javnim i nekategorisanim cestama.

Dužnost PU je da najmanje dva puta godišnje dostavi podatke o vrstama i vremenu događanja saobraćajnih nesreća općinskoj službi nadležnoj za poslove saobraćaja.

II ORGANIZACIJA I REGULISANJE SAOBRAĆAJA

Član 8.

Općinski načelnik na prijedlog Službe nadležne za poslove saobraćaja odobrava, predlaže i provodi mjere za unapređenje bezbjednosti saobraćaja, vrši organizaciju i izmjenu režima saobraćaja na javnim saobraćajnim površinama općine Olovo.

Izmjena režima saobraćaja u smislu ove Odluke podrazumjeva:

- Promjena režima saobraćaja, uvođenje jednosmjernih i dvosmjernih ulica, određivanje prioriternih pravaca, preusmjeravanje saobraćajnih tokova.
- U ulici „Školska“ u radne dane u vremenu od 07,00 do 20,00 sati zabranjuje se saobraćaj za sva m/v, izuzev vozila JKP „Bioštica“, dostavnih vozila i vozila sa posebnim odobrenjem koje izdaje općinska služba nadležna za poslove saobraćaja.
- Za održavanje kulturnih, sportskih i drugih javnih skupova određuje se „školski poligon“ u ul. „Školska“.
- Promjene u organizaciji i načinu i uslovima upravljanja i korištenja parking prostora.
- Druge promjene kojima se poboljšava kvalitet i bezbjednost saobraćaja.

Član 9.

Privremene izmjene režima saobraćaja ili privremeno ograničenje saobraćaja naredbom može izvršiti Policijska stanica Olovo u hitnim slučajevima koji ne trpe odlaganja uz saglasnost općinske službe nadležne za poslove saobraćaja:

- Izvođenje kulturnih manifestacija čije održavanje ovisi o izmjeni režima saobraćaja.
- Održavanje sportskih manifestacija.
- Održavanje drugih javnih skupova građana.

Član 10.

Tehničke poslove na osiguranju bezbjednosti saobraćaja, općinski načelnik povjerava ugovorom registrovanom pravnom ili fizičkom licu.

Tehnički poslovi podrazmijevaju:

- Postavljanje, zamjena, uklanjanje i održavanje saobraćajne signalizacije (horizontalne, vertikalne i svjetlosne)
- Održavanje putnih površina i pratećih putnih objekata i njihovu gradnju.

Član 11.

Osim zakonom propisane saobraćajne signalizacije, na javnim saobraćajnim površinama koje su u nadležnosti općine Olovo mogu se postavljati reklamne table, panoji i natpisi, samo uz odobrenje nadležne općinske Službe.

Odobrenjem se propisuje i visina naknade za korištenje javne saobraćajne površine za ove svrhe.

III OGRANIČENJA I ZABRANE

Ograničenje brzine kretanja:

Član 12.

Na cestama u naseljenim mjestima općine Olovo vozač ne smije da se vozilom kreće brzinom većom od 40 km/h, odnosno brzinom većom od označene saobraćajnim znakom za cijelo naseljeno mjesto ili njegov dio. Učesnici u saobraćaju dužni su da se pridržavaju ograničenja brzine kretanja vozila izraženih postavljenim saobraćajnim znakovima.

Zabrana zaustavljanja i parkiranja:

Član 13.

Zabranjuje se zaustavljanje i parkiranje motornih vozila na kolovozu ulica:

- „Branilaca grada“, do raskršća sa ulicom za Karagino polje,
- „Huseina kapetana Gradaševića“, od raskrsnice sa ulicom „Bosanska“ pa do skretanja za Poštu, s obje strane,
- „Školska“, cijelom dužinom,
- „Karagino Polje“, cijelom dužinom,
- „Krivajska“,
- „1. Mart“ i
- „Jelik“.

Član 14.

Zabranjeno je zaustavljanje i parkiranje i u slijedećim slučajevima:

- bliže od 5 metara od raskrsnice,
- ispred prilaza i ulaza u stambene zgrade i podrumске prostorije,
- ispred prilaza i ulaza u garaže,
- ispred prilaza i ulaza poslovnih i javnih objekata,
- na trotoarima,
- na stajalištu javnog prijevoza i taxi prijevoza,
- na vodovodnim, PTT, kanalizacionim i drugim šahtovima,
- na gradskim zelenim površinama, parkovima i sl.,
- na rezervisanim parkirališnim mjestima bez odobrenja.

Zabrana preticanja:

Član 15.

Zabranjuje se preticanje za sva vozila i to:

- u oba smjera ulicom „Branilaca grada“ cijelom dužinom,
- ulicom „Husein kapetana Gradaščevića“ od raskrsnice navedene ulice sa ulicom „Bosanska“ do lamele V,
- u ulici „Školska“ cijelom dužinom,
- u oba smjera u ulici „Krivajska“, cijelom dužinom,
- u oba smjera u ulici „1. Marta“, cijelom dužinom,
- u oba smjera u ulici „Karagino Polje“, cijelom dužinom,

Član 16.

Odredbe članova 12.,13., 14. I 15. koje se odnose na ograničenje brzine kretanja, zabrane zaustavljanja, parkiranja i preticanja iz oba smjera, **ne odnose se na:**

- vozila hitne pomoći,
- vatrogasna vozila,
- vozila MUP-a i
- vojne policije,

kada ista imaju upaljen svjetlosno-zvučni signalni uređaj.

Zabrana saobraćaja:

Član 17.

Zabrana saobraćaja u jednom smjeru:

- Ulicom „Husein kapetana Gradaščevića“, od raskršća sa ulicom „Bosanska“ do raskršća sa ulicom „Branilaca grada“,
- ulicom „Bosanska“, od raskršća sa ulicom „Branilaca grada“ do raskršća sa ulicom „Huseina kapetana Gradaščevića“,
- ulicom „Školska“, od raskršća sa ulicom „Branilaca grada“ do ugostiteljskog objekta „Dalma“,
- i ulicom „Branilaca grada“ na dijelu izlaza iz stare pijace do raskršća sa ulicom „Krivajska“.

Član 18.

Zabranjuje se saobraćaj za vozila čija ukupna težina prelazi šest tona u ulicama:

- „Bosanska“,
- „Husein kapetan Gradaščević“,
- „Školska“.

Zabrana saobraćaja ne odnosi se na dostavna vozila.

Zabrana skretanja:

Član 19.

Zabranjuje se skretanje ulijevo:

- Iz ulice „Branilaca grada“ u ulicu „Bosanska“,
- iz ulice „Branilaca grada“ u ulicu „Školska“,
- sa prostora stare pijace u ulicu „Branilaca grada“.

Član 20.

Zabrana skretanja u desno:

- Iz ulice „Branilaca grada“ u ulicu „Bosanska“,
- iz ulice „Branilaca grada“ u ulicu „Školska“.

Ulica s prvenstvom prolaza:

Član 21.

- Ulica „Branilaca grada“

IV TAKSI STAJALIŠTA

Član 22.

Služba za ekonomske poslove dužna je, u skladu sa Odlukom o organizaciji i načinu obavljanja taksi-prijevoza lica na području Ze-do kantona, odrediti određenu saobraćajnu površinu za taksi stajalište i isto obilježiti propisanom vertikalnom i horizontalnom signalizacijom.

Član 23.

Broj i razmještaj taksi stajališta te broj stajališnih mjesta na taksi stajalištima, utvrđuju se na početku svake kalendarske godine do 30. januara tekuće godine.

Broj stajališnih mjesta na taksi stajalištima utvrđuje se na osnovu potreba korisnika prijevoza uvažavajući postojeće stanje već registrovanih taksi prijevoznika i imajući u vidu norme i standarde vezane za broj taksi-prijevoznika u odnosu na broja stanovnika.

V PARKIRANJE VOZILA

Član 24.

Za potrebe parkiranja vozila na području grada utvrđuju se javna parkirališta.

Javnim parkiralištem smatra se javna površina određena ovom Odlukom, namijenjena isključivo za parkiranje motornih vozila.

Član 25.

Javna parkirališta mogu biti opća i rezervisani prostor za parkiranje.

- Opća parkirališta su javne površine namijenjene za parkiranje putničkih automobila, kombi i teretnih vozila do 2,5 tona nosivosti.

- rezervisani prostor za parkiranje vozila je javna površina koja se rezerviše za parkiranje motornih vozila od strane registrovanih privrednih subjekata i dr. pravnih lica.

Član 26.

Javna parkirališta moraju biti označena u skladu sa Pravilnikom o saobraćajnim znakovima i signalizaciji, a prema Projektu saobraćajne signalizacije.

Obilježavanje javnih parkirališta vrši pravno lice, ovlašteno od strane Načelnika općine Olovo.

Član 27.

Javna parkirališta u gradu određena ovom Odlukom su:

- Desna strana ulice Branilaca grada od raskršća sa ulicom za Karagino Polje do prilaza garažama Doma zdravlja Olovo,
- Lijeva strane ulice „Husein kapetana Gradašćevića“, koja počinje od raskršća sa ulicom „Branilaca grada“ do raskršća sa ulicom „Bosanska“,
- uređena javna površina ispred hotela „Aquaterm“,
- javna površina uz dvorište Osnovne škole „Olovo“ sa ulazom iz ulice „Branilaca grada“ i izlazom na istu ulicu,
- javna površina iza stambene zgrade zv. „Karingtonka“,
- uređena javna površina zv. „Poligon“ u ulici „Husein kapetana Gradašćevića“,
- uređene javne površine ispred stambenih zgrada u ulici „Husein kapetana Gradašćevića“,
- uređena javna površina na prostoru „Stare pijace“,
- desna strana ulice „Bosanska“.

Član 28.

Na pojedinim parkiralištima može se uvesti naplata parkinga po odluci načelnika općine Olovo, na prijedlog Službe za ekonomske poslove.

Odlukom o upravljanju i naplati parking prostora određuje se pravno lice, odnosno udruženje građana koje je nosilac poslova naplate i održavanja parkirališta.

Cijena parkiranja određena je općinskim propisima o zauzimanju gradskog građevinskog zemljišta.

Naknada za parkiranje plaće se u vremenu od 07,00 sati do 20,00 sati.

U periodu od 20,00 sati do 07,00 sati narednog dana naknada za parkiranje se ne plaća.

Član 29.

Pravilnost korištenja parkirališta sa naplatom obaveza je davaoca usluga parkiranja.

Ovlaštene osobe za naplatu koriste odgovarajuću tehničku opremu koja omogućuje evidentiranje mjesta i vremena trajanja parkiranja, marke i registarskih oznaka parkiranog vozila.

Član 30.

Ako vozač-korisnik parkinga odbije da plati naknadu za parkiranje, dužan je dati ovlaštenom licu, davaocu usluge, podatke o sebi i vozilu radi pokretanja prekršajnog postupka.

Član 31.

Parkirališna mjesta mogu se rezervisati.

Za rezervisani parkirališni prostor plaća se naknada određena općinskim propisima o zauzimanju gradskog građevinskog zemljišta.

Rezervisani prostor mora biti obilježen odgovarajućom saobraćajnom signalizacijom, a vozila moraju biti obilježena odgovarajućom oznakom kojunizdaje davalac usluge parkiranja.

Član 32.

Na svakom javnom parkiralištu odredit će se dovoljan broj parking prostora za vozilo invalidnih osoba, a što će se urediti Odlukom o upravljanju i naplati parking prostora.

Član 33.

Na mjestima koja su određena kao parking prostor za motorna vozila zabranjeno je ostaviti neispravno ili havarisano vozilo duže od 24 sata.

Ako ovlašteni službenik policije na prostoru namijenjenom za saobraćaj i parkiranje vozila zatekne ostavljeno, neispravno ili havarisano vozilo angažovat će se JKP „Bioštica“ da isto ukloni o trošku vlasnika vozila, na deponiju koju održava JKP „Bioštica“ Olovo.

Ako je vlasnik, odnosno korisnik nepoznat ili je vozilo bez oznake, isto će se ukloniti na teret budžeta Općine.

VI AUTOBUSKO STAJALIŠTE

Član 34.

Autobusno stajalište u gradu Olovo i autobuska stajališta koja su izgrađena i smještena na regionalnim i lokalnim cestama moraju se urediti u skladu sa Pravilnikom o minimalno-tehničkim uslovima za projektovanje i uređenje autobusnih stajališta („Službene novine FBiH“, broj: 48/03). Autobuska stajališta moraju biti obilježena odgovarajućom saobraćajnom signalizacijom.

VII VRŠENJE OBUKE

Član 35.

Početni dio obuke za upravljanje motornim vozilom vrši se u ulici „Prvog marta“, sa polazištem na uređenoj javnoj površini uz stambeni objekat Vrućak Mehmedalije.

Polazno mjesto mora biti obilježeno odgovarajućom saobraćajnom signalizacijom.

Zabranjuje se obučavanje kandidata za upravljanje motornim vozilom na području naseljenog mjesta Olovo petkom, u vremenu od 06,00 do 20,00 sati.

VIII POSEBNE MJERE ZA BEZBJEDNOST SAOBRAĆAJA

Član 36.

U ulici „Školska“ izvršiti postavljanje „preventivne izbočine“ na kolovoznoj traci radi unapređenja sigurnosti pješaka u saobraćaju, a prema idejnom rješenju.

Član 37.

Na javnim površinama na kojima se odvija saobraćaj i drugim javnim površinama u naseljenom mjestu Olovo zabranjeno je pranje, čišćenje i opravka vozila.

Član 38.

Ako se dio kolovoza i trotoara koristi za izvođenje radova na građevinskim objektima, korisnik objekta, odnosno izvođač radova je dužan izvršiti obilježavanje zauzete površine odgovarajućim saobraćajnim znacima i obezbjediti odgovarajućom zaštitnom mrežom.

Ako se dio kolovoza ne može koristiti za bezbjedno odvijanje saobraćaja, izvođač radova ili korisnik objekta obavezan je da na oba kraja kolovoza postavi odgovarajući znak i branike po širini kolovoza kojim se potpuno zatvara opasna zona.

Ako se dio kolovoza, trotoara ili neke druge saobraćajne površine za vršenje javnog saobraćaja ošteti ili uništi prilikom izvođenja radova, izvođač radova dužan je po okončanju radova dovesti javnu površinu za vršenje javnog saobraćaja u prvobitno stanje.

Član 39.

Trotoar i kolovoz ne mogu se koristiti za istovar i utovar robe. Izuzetno, trotoar i dio kolovoza mogu se koristiti za istovar i utovar materijala i robe ukoliko za to nema drugih mogućnosti, s tim da se istovareni materijal sa trotoara ili dijela kolovoza mora ukloniti ODMAH po izvršenom istovaru, uz prethodno odobrenje PU Olovo, PS Olovo.

Dio kolovoza ili trotoar nakon uklanjanja robe, odnosno drugog materijala mora se potpuno očistiti i oprati, zavisno od toga o kojoj robi/materijalu je riječ.

Član 40.

Zabranjuje se lagerovanje oble i rezane građe, raznog materijala i sl., postavljanje tezgi i stolova na javnim cestama (lokalne ceste i ulice u naseljenim mjestima i gradu Olovo) i trotoarima, i nekategorisanim cestama (ogrijeva, sijena i dr.materijala).

Na trotoarima gradskih ulica mogu se postaviti prodajne tezge i stolovi uz odobrenje nadležne općinske Službe, vodeći računa da se time ne umanjuje bezbjednost i sigurnost učesnika u saobraćaju.

Član 41.

Nadležni općinski organ, po ovlaštenju općinskog načelnika, može radi bezbjednosti i nesmetanog odvijanja saobraćaja na nekategorisanim putevima obustaviti saobraćaj ili odrediti posebno ograničenje za pojedine vrste vozila, kao i ograničenje brzine kretanja vozila dok postoje razlozi zbog kojih se te mjere poduzimaju. Obaveze i ograničenja iz stava 1. ovog člana moraju biti blagovremeno saopštena učesnicima u saobraćaju propisanim saobraćajnim znacima i na drugi pogodan način.

Član 42.

Prekopavanja i iskopavanja javnih i nekategorisanih cesta može se vršiti samo uz prethodno pribavljenu saglasnost Službe za ekonomske poslove.

Član 43.

Površine namijenjene za saobraćaj mogu se koristiti u druge svrhe samo u izuzetnim slučajevima, uz prethodno odobrenje nadležne općinske službe i PU Olovo, PS Olovo.

IX PROTIV-POŽARNI PUTEVI

Član 44.

Protivpožarni putevi se određuju po požarnim sektorima:

- Požarni sektor broj 1. predstavljaju soliteri i lamele u ulici H.K.Gradašćevića cijelom dužinom, prolaz između solitera i lamela i prostor iza zgrada.
- Požarni sektor broj 2. predstavlja uže gradsko jezgro. Protivpožarni putevi za ovaj sektor su: ulica „Branilaca grada“ od raskrsnice magistralnog puta M-18 i regionalnog puta R-467 do mosta na rijeci Stupčanici, ulica „Bosanska“ cijelom dužinom, prolaz iz ulice „Bosanska“ između zgrade

„Stara pošta“ i prodavnice Pašalić Hamde, prolaz iz ulice „H.K.Gradaščevića“ i pored niza garaža u „Parkić“, prolaz iz ulice „Branilaca grada“ iza zgrade „Šumarstva“, prilazni put zgradi bivše „Gvoždare“ iz ulice „Branilaca grada“, prilaz „Domu kulture“ sa poligona za obuku vozača.

- Požarni sektor broj 3. obuhvata dio grada na desnoj obali rijeke Stupčanice. Protivpožarni putevi u ovom sektoru su: ulica „Branilaca grada“ od mosta na rijeci Stupčanici do njenog kraja, ulica „Školska“ cijelom dužinom, zatim ulica „1.Marta“ cijelom dužinom, prolaz iz ulice „Branilaca grada“ u zanatski centar (bivša pijaca), prilaz MSS do zgrade i prilaz do kotlovnice, prilaz kotlovnici i fiskulturnoj Sali OŠ, prolaz između ulica „Školska“ i „Branilaca grada“ pored zgrade „Karingtonka“, prolaz između zgrade „Stara željeznička stanica“ i „Karingtonka“, prolaz do kotlovnice „Doma zdravlja“.
- Požarni sektor broj 4. predstavlja padinske dijelove grada Olova: Gornje Olovo, Jasen, Bioštica, Zagrađe, Karagino Polje i Jelik. Protivpožarni putevi su svi oni koji vode kroz ova naselja.
- Požarni sektor broj 5. predstavlja pojedinačno sva naselja ruralnog tipa na području općine Olovo. Protivpožarni putevi su svi oni koji vode kroz ova naselja.

Član 45.

Širina protiv-požarnog puta ne može biti manja od 3,50 m.

Svi pomenuti protiv-požarni putevi moraju biti prohodni non-stop.

X KAZNE NE ODREDBE

Član 46.

Novčanom kaznom u iznosu od 2.000,00 do 5.000,00 KM kaznit će se pravno lice:

1. Ako postupi protivno odredbama člana 4. stav 2. ove Odluke.
2. Ako postupi protivno odredbama člana 42.ove Odluke.

Novčanom kaznom u iznosu od 1.000,00 do 3.000,00 KM kaznit će se fizičko lice:

1. Ako postupi protivno odredbama člana 4. stav 2. ove Odluke.
2. Ako postupi protivno odredbama člana 42.ove Odluke.

Za navedene prekršaje kaznit će se i odgovorno lice u pravnom licu u iznosu od 500,00 do 1000,00 KM.

Član 47.

Novčanom kaznom u iznosu od 500,00 KM do 2000,00 KM kaznit će se pravno lice, novčanom kaznom u iznosu od 100,00 do 300,00 KM odgovorno lice u pravnom licu i fizičko lice u iznosu od 100,00 do 300,00 KM ako:

1. Postupi protivno odredbama člana 3. stav 3. ove Odluke.
2. postupi protivno odredbama člana 11. ove Odluke.

Član 48.

Novčanom kaznom u iznosu od 100,00 do 300,00 KM kaznit će se za prekršaj:

1. vozač koji se vozilom na putu u naselju kreće brzinom koja je za 30 km/h veća od dozvoljene brzine, odnosno vozač koji se vozilom na putu van naselja kreće brzinom koja je 50 km/h veća od dozvoljene brzine.

Član 49.

Novčanom kaznom od 40,00 KM kaznit će se za prekršaj:

1. vozač koji u saobraćaju se ne pridržava ograničenja, zabrana ili obaveza izraženih pomoću postavljenih saobraćajnih znakova, osim saobraćajnih znakova ograničenja brzine, a što je suprotno odredbama članova 15.17.18. i 19. ove Odluke.
2. vozač koji zaustavi ili parkira motorno vozilo protivno odredbama člana 13 i 14. ove Odluke.
3. vozač koji se vozilom na putu u naselju kreće brzinom većom od dozvoljene od 20 km/h do 30 km/h, odnosno od 30 km/h do 50 km/h van naselja.
4. vozač korisnik parking prostora koji odbije da plati naknadu za parkiranje.

Član 50.

Novčanom kaznom u iznosu od 50,00 do 100,00 KM kaznit će se pravno, odnosno fizičko lice ako:

- ostavi neispravno, havarisano vozilo na prostoru namijenjenom za parkiranje vozila ili drugoj javnoj površini duže od 24 sata (član 33.)
- na javnim površinama na kojima se odvija saobraćaj i kod stambenih zgrada u naseljenom mjestu Olovo vrši pranje, čišćenje i opravka vozila (član 37.)
- Dio kolovoza ili trotoara koji se koristi za izvođenje radova na građevinskim i drugim objektima ne obilježi ili ne obezbjedi na drugi odgovarajući način (član 38.)
- Ako se javna i nekategorisana cesta koristi za lagerovanje oble i rezane građe, postavljanje tezgi i stolova, te ako se na putevima koji prolaze kroz selo duže obustavlja saobraćaj zbog istovara sijena, drva i sl. (član 39. i 40.)

Član 51.

Novčanom kaznom u iznosu od 100,00 do 300,00 KM kaznit će se instruktor za vršenje obuke kandidata za vozače ako postupi protivno odredbama člana 35.ove Odluke.

Član 52.

Roditelj, usvojitelj ili staratelj maloljetnika koji je učinio prekršaj iz ove Odluke kaznit će se novčanom kaznom propisanom ovom Odlukom, ako je izvršenje prekršaja posljedica propuštanja dužnog staranja nad maloljetnikom.

XI PRELAZNE I ZAVRŠNE ODREDBE

Član 53.

Za sprovođenje ove Odluke zaduženi su nadležna općinska služba i PU Olovo.

Član 54.

Danom stupanja na snagu ove Odluke prestaje da važi Odluka o saobraćaju broj: 01-27-1298/04 od 01.07.2004.g.

Član 55.

Ova Odluka stupa na snagu osmog dana od dana objavljivanja u „Službenom glasniku Općine Olovo“, a primjenjivat će se od 04.07.2013.godine.

Broj: 01-01-3-1724/13
Datum, 04.06.2013.godine

**PREDSJEDAVAJUĆI
OPĆINSKOG VIJEĆA**

Izudin Kućanović, dr.med. s.r.

Na osnovu člana 26. Zakona o prostornom uređenju ("Službene novine Zeničko Dobojskog kantona" br:2/04), i člana 18. Statuta Općine Olovo («Sl. Glasnik Općine Olovo» br: 2/07 i 4/08), Općinsko Vijeće na sjednici održanoj 04.06.2013. godine d o n o s i

ODLUKU
O izmjeni i dopuni Odluke o usvajanju
Regulacionog plana Olovo-Centar i Padine

Član 1.

Ovom Odlukom vrši se izmjena i dopuna Odluke o usvajanju, izmjenama i dopunama Regulacionog plana Olovo-Centar broj;1/2-07-110/89 od 25.09.1989 ("M.S.G. Sarajevo" broj;14/89).

Član 2.

Na području Regulacionog plana Olovo-Centar i Padine, na parceli k.p.489/2 zv. „Vrt“ K.O.Olovo novoga premjera, a koja se nalazi u ul. Krivajska bb. ucrtava se lokacija za izgradnju porodično stambenog objekta dimenzija 7,90x7,30m spratnosti P+0.

Član 3.

Ova Odluka objavit će se u "Službenom Glasniku" općine Olovo, a stupa na snagu narednog dana po objavljivanju.

PREDSJEDAVAJUĆI
OPĆINSKOG VIJEĆA

Broj: 01-01-3- 1688/13
Datum; 04.06.2013.godine

Izudin Kućanović dr.med. s.r.

Na osnovu člana 26. Zakona o prostornom uređenju ("Službene novine Zeničko Dobojskog kantona" br:2/04), i člana 18. Statuta Općine Olovo («Sl. Glasnik Općine Olovo» br: 2/07 i 4/08), Općinsko vijeće na sjednici održanoj 04.06.2013. godine d o n o s i

ODLUKU
O izmjeni i dopuni Odluke o usvajanju
Regulacionog plana Olovo-Centar i Padine

Član 1.

Ovom Odlukom vrši se izmjena i dopuna Odluke o usvajanju, izmjenama i dopunama Regulacionog plana Olovo-Centar broj;1/2-07-110/89 od 25.09.1989 ("M.S.G. Sarajevo" broj;14/89).

Član 2.

Na području Regulacionog plana Olovo-Centar i Padine, na parceli k.p.859/2 zv. „Okučnica“ K.O.Olovo novoga premjera, a koja se nalazi u ul. Jelik bb. ucrtava se lokacija za izgradnju pomoćnog objekta - garaže dimenzija 6,00x5,00m spratnosti P.

Član 3.

Ova Odluka objavit će se u "Službenom Glasniku" općine Olovo, a stupa na snagu narednog dana po objavljivanju.

PREDSJEDAVAJUĆI
OPĆINSKOG VIJEĆA

Broj: 01-01-3- 1689/13
Datum; 04.06.2013.godine

Izudin Kućanović dr.med. s.r.

Na osnovu člana 13. Tačka c. Zakona o pripadnosti javnih prihoda u Federaciji BiH ("Službene novine F BiH" br:22/06), tačke 3. Odluke o komunalnom redu („Službeni glasnik općine Olovo“ broj:3/05) i člana 18. Statuta Općine Olovo («Sl. Glasnik Općine Olovo» br: 2/07 i 4/08), Općinsko Vijeće na sjednici održanoj 04.06.2013 godine d o n o s i

ODLUKU
O izmjeni Odluke o visini naknada i uslovima korištenje
javnih površina na području općine Olovo

Član 1.

Ovom Odlukom vrši se izmjena Odluke o visini naknada i uslovima korištenja javnih površina na području općine Olovo broj:01-01-3-2014/07 od 21.05.2007 godine.

Član 2.

Mijenja se član 10. Stav 12. Odluke o visini naknada i uslovima korištenja javnih površina na području Općine Olovo tako da glasi:

Visina naknade za zakup parking prostora (površine do 10 m²) u I zoni iznosi 1 KM dnevno. Naknada se plaća mjesečno unaprijed, do 5-og u mjesecu za tekući mjesec.

Član 3.

Ova Odluka objavit će se u "Službenom Glasniku" Općine Olovo, a stupa na snagu narednog dana po objavljivanju.

PREDSJEDAVAJUĆI
OPĆINSKOG VIJEĆA

Broj: 01-01-3- 1690/13
Datum; 04.06.2013. godine

Kučanović Izudin dr.med. s.r

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINA OLOVO
OPĆINSKO VIJEĆE

Na osnovu člana 18. Statuta Općine Olovo („Službeni glasnik Općine Olovo“ broj: 2/07 i 4/08), Općinsko vijeće na VII redovnoj sjednici održanoj 04.06.2013. godine, razmatrajući Preporuku Institucije ombudsmena/ombudsmana za ljudska prava Bosne i Hercegovine
d o n o s i

R J E Š E N J E
o poništenju Rješenja o imenovanju predsjednika i članova
Upravnog odbora JU „Dom zdravlja“ Olovo

I

Poništava se Rješenje o imenovanju predsjednika i članova Upravnog odbora JU „Dom zdravlja“ Olovo broj: 01-01-3-201/13 od 29.01.2013. godine, objavljeno u „Službenom glasniku Općine Olovo“ br: 2/13 od 07.02.2013. godine.

Rješenje se poništava po Preporuci Institucije Ombudsmena za ljudska prava Bosne i Hercegovine, broj: Ž-SA-05-1415/12 i Ž-SA-05-8/13 P-89/13 od 25.03.2013.

II

Rješenje stupa na snagu danom donošenja i objavit će se u „Službenom glasniku Općine Olovo“

Broj: 01-01-3-1686/13
Datum, 04.06.2013. godine

PREDSJEDAVAJUĆI
OPĆINSKOG VIJEĆA

Izudin Kućanović, dr.med. s.r.

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINA OLOVO
OPĆINSKO VIJEĆE

Na osnovu člana 64. Stav 8. Zakona o zdravstvenoj zaštiti („Službene novine F BiH“ broj: 46/10) i člana 18. Statuta Općine Olovo („Službeni glasnik Općine Olovo“ broj: 2/07 i 4/08), Općinsko vijeće na VII redovnoj sjednici održanoj 04.06.2013. godine na osnovu ukazane potrebe, a na prijedlog Općinskog načelnika, d o n o s i

R J E Š E N J E

O imenovanju privremenog Upravnog odbora JU „Dom zdravlja“ Olovo

I

Usljed poništenja Rješenja o imenovanju predsjednika i članova Upravnog odbora JU Dom zdravlja Olovo, broj: 01-01-3-201/13 od 29.01.2013. godine, a po Preporuci Institucije Ombudsmena za ljudska prava Bosne i Hercegovine, u cilju kontinuiteta rada organa upravljanja i nesmetanog funkcionisanja Ustanove do konačnog imenovanja Upravnog odbora u redovnoj proceduri, Imenuje se privremeni Upravni odbor JU „Dom zdravlja“ Olovo u sastavu:

1. Ibrahim Hasić, predsjednik
2. Sakiba Hasanspahić, član
3. Miralem Mehanović, član

II

Privremeni Upravni odbor JU „Doma zdravlja“ Olovo, obavljat će svoju dužnost u trajanju najduže 2(dva) mjeseca do kada treba provesti postupka imenovanja Upravnog odbora u skladu sa načelima utvrđenih Zakonom o ministarskim, vladinim i drugim imenovanjima u Federaciji BiH.

III

Rješenje stupa na snagu danom donošenja i objavit će se u „Službenom glasniku Općine Olovo“

Broj: 01-01-3-1694/13
Datum, 04.06.2013. godine

PREDSJEDAVAJUĆI
OPĆINSKOG VIJEĆA

Izudin Kućanović, dr.med. s.r.

Na osnovu člana 8. Zakona o ministarskim, vladinim i drugim imenovanjima Federacije Bosne i Hercegovine ("Službene novine Federacije BiH", broj 12/03), u skladu sa članom 18. stav 1. alineja 18. Statuta Općine Olovo („Službeni glasnik općine Olovo“, broj: 2/07 i 4/08) Općinsko vijeće Općine Olovo na sjednici održanoj dana 04.06.2013.godine, **d o n o s i**

O D L U K U

o utvrđivanju kriterija za imenovanje u reguliranim tijelima općine Olovo Nadzorni/upravni odbori u javnim preduzećima i javnim ustanovama

I

Ovom Odlukom utvrđuju se kriteriji za imenovanje u reguliranim tijelima općine Olovo Nadzorni/upravni odbori u javnim preduzećima i javnim ustanovama prema tekstu kriterija koji je sastavni dio ove Odluke.

II

Odluku o raspisivanju javnog oglasa za imenovanja na upražnjene pozicije u reguliranim tijelima općine Olovo donosi Općinski načelnik u skladu sa Zakonom o ministarskim, vladinim i drugim imenovanjima u Federaciji BiH.

III

Za provođenje postupka imenovanja na upražnjene pozicije u reguliranim tijelima općine Olovo imenuje se Komisija rješenjem Općinskog načelnika.

Komisija se imenuje shodno Zakonu o ministarskim, vladinim i drugim imenovanjima u Federaciji BiH, sastoji se od 5 (pet) članova i zadužena je za pregledanje prijava i sačinjavanje rang liste uspješnih kandidata.

IV

Evidenciju o predsjednicima i članovima upravnih i nadzornih odbora Javnih ustanova i Javnih preduzeća općine Olovo, trajanju i isteku njihovih mandata vodi Stručna služba Općinskog vijeća.

V

Stupanjem na snagu ove Odluke prestaje da važi Odluka o utvrđivanju kriterija za imenovanje u upravne odbore zdravstvenih ustanova (broj: 01-01-3-1759/12 od 25.07.2012. godine).

VI

Ova Odluka stupa na snagu danom objavljivanja u "Službenom glasniku općine Olovo".

Broj: 01- 01-3- 1691/13
Datum, 04.06.2013. godine

**PREDSJEDAVAJUĆI
OPĆINSKOG VIJEĆA**

Izudin Kućanović, dr. med. s.r.

Na osnovu člana 8. Zakona o ministarskim, vladinim i drugim imenovanjima Federacije Bosne i Hercegovine ("Službene novine Federacije BiH", broj 12/03), u skladu sa članom 18. Statuta Općine Olovo („Službeni glasnik općine Olovo“, broj: 2/07 i 4/08) Općinsko vijeće Općine Olovo na sjednici održanoj dana 04.06.2013.godine, **d o n o s i**

K R I T E R I J E

za imenovanje u reguliranim tijelima općine Olovo Nadzorni/upravni odbori u javnim preduzećima i javnim ustanovama

I

Kandidati za imenovanje u regulirana tijela Općine Olovo dužni su da ispunjavati opće i posebne uslove.

1. Opći uslovi:

- a) da su stariji od 18 godina,
- b) da nisu otpušteni iz državne službe kao rezultat disciplinske mjere na bilo kojem nivou u Bosni i Hercegovini (bilo na nivou države ili entiteta) u periodu od tri godine prije dana objavljivanja upražnjene pozicije,
- c) da se na njih ne odnosi član IX. 1. Ustava Bosne i Hercegovine, odnosno da nije pod optužnicom Međunarodnog suda za ratne zločine u bivšoj Jugoslaviji,
- d) da nisu osuđivani za krivično djelo i da se protiv njih ne vodi krivični postupak i privredni prijestup nespojiv s dužnošću u reguliranom tijelu, pet godina od pravosnažnosti presude, isključujući vrijeme zatvorske kazne,
- e) da nisu osobe kojim je presudom suda zabranjeno obavljanje aktivnosti u nadležnosti nadzornog odbora,
- f) da nisu stariji od 65 godina,
- g) da nisu na dužnosti u političkoj stranci u smislu članka 5. Zakona o ministarskim, vladinim i drugim imenovanjima u FBiH („Službene novine FBiH“, broj: 34/03),
- h) da nisu članovi tijela zakonodavne, izvršne vlasti ili savjetnik u smislu Zakona o sukobu interesa u organima vlasti Federaciji BiH („Službene novine FBiH“, broj: 70/08),
- i) da nemaju privatni finansijski interes u reguliranom tijelu u koje se kandidiraju u smislu članka 2. tačka 1.2 Zakona o ministarskim, vladinim i drugim imenovanjima u F BiH („Službene novine FBiH“, broj: 34/03),

Lični podaci o podnosiocima prijave iz tačke d) i e) općih uslova prikupljat će se službenim putem shodno Zakonu o zaštiti ličnih podataka u BiH.

II

Osim ovih općih uslova, osnov za izbor i ocjenjivanje bit će stepen obrazovanja, znanja, iskustva i drugog, što je, prema mišljenju Općinskog načelnika, neophodno ili poželjno s obzirom na prirodu poslova koje treba obavljati.

2. Posebni uslovi:

- da imaju najmanje višu stručnu spremu, s tim da je poželjno da kandidati imaju visoku stručnu spremu pravnog i ekonomskog smjera i stručnu spremu iz oblasti koja je srodna osnovnoj djelatnosti preduzeća/ustanove,
- da imaju najmanje tri (3) godine radnog iskustva,
- da kandidat posjeduje sposobnost za savjesno, odgovorno i odlučno obnašanje pozicije, dokaz: ocjena sa intervjua,
- da kandidat posjeduje sposobnost nepristrasnog donošenja odluka, komunikacijske i organizacijske sposobnosti, dokaz: biografija i ocjena sa intervjua,
- da kandidat posjeduje pozitivne rezultate rada ostvarene tokom poslovne karijere, dokaz: slobodan izbor kandidata.

Broj: 01-01-3- 1692/13
Datum, 04.06.2013. godine

PREDSJEDAVAJUĆI
OPĆINSKOG VIJEĆA

Izudin Kućanović, dr. med. s.r.

**BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINA OLOVO
OPĆINSKO VIJEĆE**

Broj: 01-01-3- 1687/13
Datum, 04.06.2013. godine

Na osnovu člana 7. Zakona o načelima lokalne samouprave u Federaciji BiH («Službene novine F BiH», broj 49/06), Zakona o građevinskom zemljištu («Službene novine Federacija BiH», broj 25/03) i na osnovu člana 18. Statuta Općine Olovo («Službeni glasnik Općine Olovo», broj: 2/07 i 4/08), i ponude broj: 02-31-7-1135/13 od 11.04.2013. godine, Općinsko vijeće na sjednici održanoj dana 04.06.2013. godine, donijelo je

Z A K L J U Č A K

O dozvoli raspisivanja konkursa za dodjelu neizgrađenog gradskog građevinskog zemljišta na lokalitetu Karagino polje – staro korito rijeke u Olovu

1. Dozvoljava se raspisivanje konkursa za dodjelu neizgrađenog gradskog građevinskog zemljišta na lokalitetu Karagino polje – staro korito rijeke, shodno odredbama Zakona o građevinskom zemljištu i Odluci o građevinskom zemljištu Općine Olovo
2. Konkurs za dodjelu gradskog građevinskog zemljišta raspisati za parcele broj: 1285/22 dio staro korito u površini od 3170 m² i dio parcele broj 376/4 u površini od 468 m² K.O. Olovo upisane u ZK uložak broj 330 sa pravom raspolaganja na Općinu Olovo.
3. Početna cijena 1 m² površine gradskog građevinskog zemljišta koje je predmet prometa iznosi 12 KM/m², što znači da ukupna cijena za površinu od 3.638 m² iznosi 43.656,00 KM.
4. Konkursnu procedure provesti po Zakonu o građevinskom zemljištu i Odluci o građevinskom zemljištu Općine Olovo.

Dostavljeno:

1. Općinski načelnik,
2. Općinsko pravobranilaštvo,
3. Služba za ekonomske poslove 2x,
4. Evidencija,
5. a/a

**PREDSJEDAVAJUĆI
OPĆINSKOG VIJEĆA**

Izudin Kućanović, dr.med. s.r.

S A D R Ź A J

strana

1. Odluka o saobraćaju	1
2. Odluka o izmjenama i dopunama Regulacionog plana (k.p.489/2 zv Vrt, stambeni objekat Gondžić Fehim))	11
3. Odluka o izmjenama i dopunama Regulacionog plana (lok. Jelik garaža Kamenjašević Vahidin)	12
4. Odluka o izmjeni Odluke o visini naknada i uslovima korištenja javnih površina za područje općine Olovo	13
5. Rješenje o poništenju Rješenja o imenovanju Predsjednika i članova Upravnog odbora JU Dom zdravlja Olovo	14
6. Rješenje o imenovanju Privremenog upravnog odbora JU Dom zdravlja Olovo	15
7. Odluka o utvrđivanju kriterija za imenovanje u reguliranim tijelima općine Olovo Nadzorni/upravni odbori u JP i JU.	16
8. Kriteriji za imenovanje u reguliranim tijelima općine Olovo Nadzorni/upravni odbori u JP i JU.	17
9. Zaključak o dozvoli raspisivanja konkursa za dodjelu neizgrađenog gradskog građevinskog zemljišta na lokalitetu Karagino polje-staro korito rijeke u Olovu	18

Ovaj Službeni glasnik istaknut je na Oglasnoj tabli
Općine Olovo dana **13.06.2013.godine.**

Ovjerava:
SEKRETAR
OPĆINSKOG VIJEĆA

Zijad Karić, dipl. pravnik,